

La Fêta Diu à Trétoren

Tan ka na ventaina d'an en déra, laré la mouda vèr nô, kon fassavé tui lou dou zan la parada. On an, laré à Trétoren, l'atre an, à la Voude Lié. Kan fazavan parada bâ se, lou Vodelen veniavan bâ, et kan laré amon lé, lou noutrou alavan amon. Tieu kalanvan bâ ou amon, laran pluto lou dzouvueno ou bin tieu e fréquantanvan. On ne dezavé pa adon, fairé parada, on dezavé bueché. Sa buecha, laré paya en partia pè la kemeuena, et, le vin laré paya pè sé ke lavé mizau la drapau lou dou zan de devan. La Fêta kementiévé dza la véllie. Kan senanvan lé Maria, on teryévé dza kou de morta. Le lende-

man, à lé Maria, on teryévé mè lou morta. A la Voude Lié, en dion, dé morta, de lé boité. Pè ché zeuré, lou seuda, dé dzouvueno pluto, et assebin kake yeu, laran dza entie. Laré on lieutenant ou bin onsèrgen veti en seuda e lou kemandavé. L'alavan tui à la méssa matenare. Lou zontieu ke navan min de fuezi, dé convoyeu, dé sanitaïro, portavan eu Laze de lé crèssen polé fairé bèniré pè l'encuera. Pendan le sèrmon, sisse se, yeu dezavé d'itré sadzo si dzo entie, de ne pa troi baré, et è tieu ke frékantanvan de ne pa troi meniota, parce ke le gallin de seuda, lé asse dondzereu ka la peudra. Mé, n'empatzé, ke di vè le tâ, laran bramen tui bon sou. Pendan le gran méssa, lou seuda so-branvan déra le Laze à fairé deu crué divi, poi, pendan l'élévachon, fazanvan na détardze. Aprè cen, laré la protechon tan ke lié pe la gara, preu soven tan ke bâ à la Tena, avué lé fellé en avan, la muezika, lou tzantré, lou seuda, le dai avué l'encuera bin à l'ombra dezo et bin enta de seuda et de consèllié po monta la garda, enfin, aprè laré pié lé dzen et lé féné. Laré assebin l'abitude de fairé tré reposoi. On su la place, on à la gara et on à la Tena. Tieu reposoi l'aran fai, sé deu veladzo pè lé Seu. Lou zatro pè de lé zatre féné.

Cen laré mé on dépié po sé féné. Volovan teté lava mio fai l'ena ke l'atra. Se dépiétanvan dza eu Laze por ava dé tzandéla po garni tieu reposoi.

A miédzo, tzacon aave gouia, tzacon de yeu lau. Lou zon itanvan pèr entie ayo à gorfà de la lendena ou de la crèssen. Pè davué zeuré, laré mé le rassemblémen de tui lou seuda et de la muezika. Apré, l'alavan tui, muezika en téta, baré on varo vè Moncheu l'encuera, et, entie, en se nonieu, fasanvan na détardze, le même afaire vè Moncheu le Vecairo, et onco bin soven vè le Seu. Entie, layitanvan pa vuarba, parce ke layavé ren à baré. Aprè cen, pè cen, pè katre euré on aportavé lé crèssen ke l'encuera lavé bin bèni le matin à la méssa matenare, et on bévavé le vin ke lavé itau paya pè sé ke lavé mizau le drapau lou dou zan de devan.

Aprè la distribuchon de lé crèssen, luiché alavé inau su la lopye de la moison d'écou-la avué le drapau po la miza. Sé drapau, dé kou, l'alavé davou la Tena, dé kou d'amon la Tena, et onco preu soven lié à Tzenarlié. Bin soven, sè drapau cotavé dé prié de fou, mé, laré prèske todzo paya pè de lé zemparé. Laré sé ke lavé buetau le mé de litré ke lavé le drapau. Sè vin, laré preu prèske todzo éstra bon, sena on seul kon. On an, sé ke lavé mizau le drapau, lavé fai venin sè vin di pe na fabrika de vin di pè Mora. Sé vin, lavé itau fai avué de l'aivue, deu socro candi et dé rezin scé. Ke, asetou, lou seuda et la muezika lan itau ple sau ke malado. Se son teparadenau ke sè vin lavé pa deu fenden de pès. entie. Se son bailla le mo de ne pa mé buoché, se cen ne tchandgiévé pa.

Lé por cen ke, di entie, la kemuena la de- cidau ke, sé ke mizere le drapau, le payere en ardzen, pa mé avué deu vin de fabrika.

A la fin de la Fêta, aprè ava tui bu et bin gaillenau, lou dzouvueno partèsse yeu

tzoupinné et lou mariu yeu féné. Parce ke parai ke veti en seuda, lé féné treuvon lou zomo on mué ple dègo. Fau dré assebin ke le gallin de seuda d'adon, laré pa si de vora. Et, lé prèske bramen soven, lou zan ke bueson ke leya le mé de batémo. On yadzo, lavan fan de dré, ke lé maré sadzé balliévan po de lé méssé, po mantenin la parada.